

四庫全書

集部

欽定四庫全書

伐檀齋集卷十一

明 張元凱 撰

七言絕句

軍中樂二十首

有序

余結髮時閱史冊載古名將度絕幕以邀奇勳
過心翩翩向慕之也撫壯而世及戎官則束濕
文法無能遠引尺寸以自樹服兜鍪而荷劔戟
不過以之趨踣蒲伏於街亭司府間耳嗟嗟人
役擾擾十年載罹患侮命也何如壬申歲復有
漕渠之役秋泊潞河塞垣在望乃擬軍中樂凱

數事而為歌詩座客能為燕趙聲酒酣擊節恍如從事於栗姚武剛車前也

出塞

元戎十乘度龍沙旂旆悠悠士不譁踴躍長驅三萬里
烽烟未熄肯言家

乘障

亭障巉巖照夕烽盛秋都護肅臨戎漁陽塞外嚴凝氣
一片陰山積雪中

戰勝

雲中不閉鴈門關，滅竈沉烽白日閒。
蕃騎寇邊三百萬，單于僅以六羸還。

受降

漢家飛將會龍城，面縛千羣向柳營。
幕府何須計首級，但圖麟閣是功名。

屯

時平塞外野蒼蒼，休息三軍藝稻梁。
耕鑿已堪忘帝力，不知何地是沙場。

獵

走狗呼鷹徧草萊
干城須仗兔罝才
經過捕得雲中敵
畜產車輜席卷回

擊劔

劔佩昆吾靖朔邊
鏐生明月匣生蓮
斑痕任積邊庭血
一擊精靈耀紫烟

蹋鞠

鞠室纔穿約飲飛
香塵浮處曳單衣
晏安只恐髀生肉

且試輕躡制手絳幃

超距

投石三軍技最優
况曾超躍羽林樓
春和塞草平鋪翠
賈勇爭先博一籌

賦詩

蓮花幕裏筆如椽
橫槩雄詞鄴下傳
却笑李陵非國士
創為兒女別離篇

射

期門結伴試穿楊
忽斷秋空朔鴈行
後臂自誇如李廣
應弦曾倒左賢王

騎

善馬羣空宛貴人
執驅校尉拜官新
試將紫燕平原獵
却使蒼鷹望後塵

歌

幕府初開鏡裏蓮
秦青新曲乍教傳
知音不返周郎顧
含態偏承主帥憐

舞

長袖蠻靴曳翠裳
依歌赴節儼成行
軍中自有纏頭錦
不學梁家墮馬妝

春游

行春小隊擁材官
尚覺邊城草色寒
馬度水來拋玉勒
鳥穿花去避金丸

賀雪

雪沒陰山大將牙
獸尊高貯紫流霞
關城不夜清笳月

營樹衝寒細柳花

博

春到邊城不射雕
營中高卧霍票姚
偏裨夜博千金注
已識軍前但用梟

飲

連營盡唱凱旋歌
塞酒渾如塞上河
主帥投醪能愛士
三軍常得醉顏酡

拜爵

天山箭定海無濤馬上旌書紀戰勞姓字一時題幕府
不為強弩即弓高

班師

封侯萬里報功成放馬桃林散甲兵生入玉關非志願
丈夫高抱樂長征

閨中詞二十首 有序

吾友西河毛生戊寅春仲忽貽我美人之什顧
余滄父儔也安能嫵媚宛轉而賡是歌乎雖然
和璧漫投貞士再則明珠愛惜季女斯飢憂暢
不齊感慨同之古丈夫心腸鐵石猶不忘月露

之詞良有以也乃貫酒榻管酒未盡而和已周
大都被酣興至不無放逸興盡悲來太深酸楚
者乎嗟夫不淫不傷風入之旨哀聲艷
曲起予者誰不以示人聊答毛生云爾

春曉

曉睡蒙蒙錦帳低合歡牀在最深閨夢魂化作雙鴛鳥
飛向竝頭蓮裏棲

錦筵

華堂疏越響朱絃有女明妝對儼然玉笋亂飛翻翠袖
淳于先已醉初筵

臨花

花枝不減去年紅
妾貌今年似不同
遊子不歸花又落
年年人老怨東風

見月

月昔圓時人共憐
人今遠去月空圓
亦知天外原同照
無奈人間各一天

覽鏡

曉帳晴暉照影孤
桃花片片撲流蘇
一枝鏡裏猶堪摘

未識狂夫記得無

持筐

取斧携筐卷袖羅柔羨無奈遠揚何桑間莫浪逢人語
調笑秋胡世上多

秋思

鸞鳳衾裯不復陳任從蛛網任從塵秋風一夕容華落
總是長門賦裏人

遠書

尺素含啼寄塞垣錦囊緘處繡雙鴛遠書未必真能達
縱辭煩憂肯盡言

山閣

憑高羅袂不勝寒笑插山花倚石闌無限遠峰浮黛色
飛來鏡裏入眉端

野航

蘭漿輕搖蓮葉開熾熾羅襪淨無埃雨雲不向巫山去
容與還從洛水來

曉汲

汲罷清泉露濕鞋
碧梧飄葉半空階
羞他井底孤凰影
墮却嫁時雙鳳釵

夜奕

手彈玉壘照銀缸
閨閣和親未受降
自是南風猶不競
無端輸子一雙雙

采蓮

鳥鷺撩亂起蒹葭
弄漿穿莎濕絳紗
世上恨無連理藕

波間喜有竝頭花

乘騎

聯鑣舉袂柳風吹銀鐙金蓮步步垂
按轡要郎花下語
莫教馬首暫參差

洞房

蘭氣俄從翠被生
燭輝猶傍繡牀明
枕邊栩栩雙蝴蝶
攪斷鴛鴦夢不成

酒肆

糟丘忽漫出芙蓉却向壚頭粉靨舒含態含嬌情不一
似曾相識馬相如

小飲

夜寒孤坐強持杯惆悵紅顏對落梅淑女未能忘旨酒
周南什裏賦金罍

弄嬰

錦襜猶自泣呱呱玩弄當年小鳳雛恐學良人游汗漫
任教繡戶不懸弧

縫衣

征衣寄去到長安
纔見霜飛木葉丹
何事深閨縫未息
高堂垂白恰初寒

擁鑪

共簇紅鑪近翠牀
貂狐袖手不成妝
願言咫尺恒相倚
莫與春風出洞房

四公子詩

孟嘗

脫秦過趙世稱雄
食客何心負
迺公魏子馮驩猶未老
忍教薛縣黍離中

信陵

六國縱橫事若麻
少年公子玉無瑕
單車一出秦兵却
計畫侯生定不差

平原

夫人弟却五城封
存得邯鄲罷折衝
門下毛生猶未識
如何肯過賣漿傭

春申

三千珠履曳長裾
權畧當年盡不如
裂土江東城郭在
夕陽秋草故吳墟

四美人詠

明妃

白龍堆裏塞雲昏
黃鶴歌殘馬上論
自恨良家充內選
也同公主嫁烏孫

飛燕

三千宮女廢昭臺飛燕雄心尚忌猜乍報殿成名合德
悔教小妹入宮來

文君

澹蕩春風膩錦江洞房人靜鳥啼雙臨邛儻賤成都客
閒却花枝鎖綠窓

綠珠

石家歌妓儼成行金谷溫柔別有鄉既是綠珠吾所愛
李倫何惜剖身藏

古劍篇

赤帝提携日月開棄捐平世卧青苔
千年英物沉埋久斗傍寒光獄底來

古鏡篇

明月長盈萬古同雕龍匣裏湛然空
恥留紅粉妍媸態烈士肝腸一照中

對酒吟二首

屈原投湘徒自潔介推逃山馬用文
時乎不遇飲美酒

高歌激散青天雲

李子黑貂不掩骭百奚伏雌聊可烹丈夫破產出門去
斗酒慰勞吳王城

古詞二首

紛華戚里不勝春年少橫行貴絕倫待賸盡歌江有汜
于田乍賦巷無人

長楊宣曲盡為家大道紛紛擁狹斜十里五樓巢翡翠
千金一足買桃花

芳宴二首

醉客金罍芳樹邊
瓊軒珠箔立嬋娟
彩雲窈窕簷間度
艷曲玲瓏花外傳

卜夜邀歡錦瑟調
滿堂蘭氣襲鮫綃
冰壺月映光逾濕
玉樹風含影太嬌

少年行二首

少年結伴出春明
十里青樓卷幔迎
游騎紛紛盡回轡
金張子弟獨橫行

呼盧徹夜玉為籌
索裏金錢若水流
昨賜飛龍廐中馬
今來輸與富平侯

楊柳詞二首

稽洛山邊春草殘
漁陽戍裏夕烽寒
故園楊柳年年綠
只有閨人帶淚看

妾夢飄揚遠翠幃
柳花飛處思依依
好隨風絮天涯去
尋得蕭郎作伴歸

衛尉春游曲二首

都護春游錦纜開
紫駟間在夕陽臺
昇平不作軍中樂
載得琵琶水上來

暮春芳樹亂鶯啼
紫障金壘遶大堤
不是海波平似鏡
將軍那得醉如泥

邯鄲客二首

邯鄲俠客長安游
青樓要入彈箜篌
單車使者來附耳
對酒不言心自籌

邯鄲俠客黃金輕
徹侯爭致公子迎
寶刀駿馬散却盡

空手笑出燕王城

故倡行二首

結客紛紛盡俠徒
身隨大將執金吾
綠鞵白馬道傍立

長揖霍家馮子都

香風逐馬御溝斜
朱邸潛歸滿袖花
女弟垂鬟纔十二
不嫌懷裏教琵琶

竹枝歌二首

燕子高樓水上開
楚江風雨竹枝哀
賈帆未向門前落

孤負春潮日日來

水落寒江露釣磯
春時去路已全非
郎今無那舟行遠
匹馬先從間道歸

青樓曲二首

翡翠樓中紫玉杯
垂楊臨水繫龍媒
蘭幃笑語春風入
夫婿甘泉侍從回

瑣窓春雨碧澄澄
羅袖生寒若不勝
花下冶游誰氏子
綠衣年少住安陵

邊將行二首

三春饗士集英髦
主帥票姚獸錦袍
洛苑乍分紅躑躅
涼州新進綠葡萄

瀚海春濤靖不驚
玉關佳氣藹邊城
虎符總逐鷹揚士
龍額先封燕頷生

閨怨二首

花落閒庭燕子歸
楚宮腰細不勝圍
三春憔悴飛蓬首
青鏡空留明月輝

落木蕭蕭江上山
鴈門不寄鴈書還
封侯豈是尋常事
游子偏多戀玉關

出門歎二首

黃金蕭索減仲產
玉龍不死酬君恩
朝來結客青樓飲
拍馬齊出春明門

昨朝易米菱花鏡
今日換酒芙蓉釵
何忍顰眉對妻子
揚揚高步長安街

道傍曲二首

金石錄卷之十一
卷十一
磊砢歎巖路不平少年場裏莫相傾肝腸在舌人皆聽
盡是清商激楚聲

長路關山感慨深愁霖毒霧晝陰陰蓮花匣裏明秋水
照見含沙射影心

客中行二首

吳兒越艷總垂髻漫學青樓綰髻高婉媚盡能歌宛轉
不知誰是鄭櫻桃

城西柳市酒家奴笑問鸛裘典盡無怪殺文君春有恙

桃花臨牖代當壚

春臺望

百尺高臺起鳳凰
郊原草木盡文章
東皇幻出千端綺
散作中天紫翠光

秋夜泊

楓岸斜連荻葦洲
棹歌聲起亂眠鷗
楚天夜靜人無寐
萬里長江片月流

俠客行二首

花月經行太主園身曾仕漢不乘軒裝齋悉與爰絲飲
肝膽唯同劇孟言

紫絲步障奏雲璈白玉深杯夜月高一宿千金三婦艷
九衢駟馬五陵豪

憶昔篇二首

憶昔君行烹伏雌封侯消息昨朝知雖然驟得金貂貴
可念牛衣對泣時

憶昔君行折柳條一為京兆路迢遙眉痕自顧真狼藉

臨鏡何曾着意描

和客晏居四詠

芳樹

天桃穠李碧城隈
黃鳥聲中淑景催
春日載陽花正好
偏宜錦瑟與金罍

冰壺

銷暑珠光映玉壺
層冰高插赤珊瑚
廣寒宮裏人難到
河朔沉酣夢入無

明月

三五清暉散碧空
鬱鬱嘉樹露華中
不堪青歲徒零落
且就芳樽隱桂叢

瑞雪

朱扉霰集轉飄揚
白雪難侵白玉觴
人壽未能躋百歲
年豐聊與醉千場

和客貧居四詩

漏屋

草色牀頭細雨霑漫移長劔挂虛簷中宵一隙生雲霧
陋室翻疑有豹潛

絕糧

羞與侏儒共一囊尚留靈草散金光子房豈是讎俱報
閉戶先尋辟穀方

謝客

室有蓬蒿釜有萍雀羅正好施空庭祁連幕下如雲客
幾箇任安念衛青

無衣

鳳甲鸛裘易幾緡且將沽酒醉芳辰生平未到秦庭哭
漫賦無衣不為貧

春思曲二首

江上行歌桃李穠風柔花煖氣融融繡幃一入春無限
朝暮巫山雲雨中

黃鳥間關最有情大堤行處落花輕亦知春色臨邛好
綠綺携將出錦城

無題二首

能歌善舞性多才
風曳輕綃素腕開
婉媚却從朱印入
此兒疑是賣珠來

清揚白皙綠雲髻
柳市蘭閨意總消
最是春眠渾不醒
主人衫袖短蕭蕭

伐檀齋集卷十一

欽定四庫全書

伐檀齋集卷十二

明 張元凱 撰

七言絕句

西苑宮詞二十四首 有序

夫古之帝王登封降禪類帝禮宗詩書之所稱述者未墜於地恭惟世廟中葉端居西齋宮者垂三十年良由睿智天縱妙應萬幾時適又安休徵協瑞日夕望祀蓬萊受釐宣室莫非祈禱長生願言久治益不出九重之內能福億兆蒼生豈秦皇漢武梯山航海騁愆以罷民哉草莽

遠臣頻遊都邑聞之客座煥焉可紀乃撰西苑
宮詞若干首雖未嘗與聞闕宮之玄妙庶幾不
誣閭闔之
頌說而已

肅將上帝祀明堂寶鼎昭回日月光九獻不須歌舊曲

詞臣昨已撰芝房

秋殿清齋正受釐迎和門外立諸姬大官不進麒麟脯

御饌唯供五色芝

陳詞瘞玉奏鈞天西苑宮牆近籍田水旱恐煩祠后土

未央深處好祈年

宮女如花滿道場
時聞雜佩響琳琅
玉龍蟠釧擎仙表
金鳳鈎鞋踏斗罡

鳳閣傳呼魚鑰開
中官齋捧御題來
直廬夜照青藜火
銀筆如椽徹曉裁

方嶽分符百道飛
四時禋類萬靈歸
休徵勒石盈青壁
瑞應成圖進紫微

一株沉水萬金裝
篆刻蛟龍縷鳳凰
工巧敢言歆上帝
精誠唯許格君王

夕烽千里照甘泉一紙降魔勅已傳急遣六丁乘羽駕
火輪金甲淨幽燕

靈藥金壺百和珍仙家玉液字長春朱衣擎出高玄殿
先賜分宜白髮臣

寶錄金籤燦几筵子雲正是草玄年石渠天祿如林士
同校宣和道藏編

千雲表擁五雷冠祈雪霄開太乙壇符鶴未回金闕靜
燭龍猶照玉宸寒

金壺漏水響丁丁直宿宮娥坐月明
潛聽象牀龍睡穩
玉階低演步虛聲

通天臺上接三台景命重臨清醮開
拜舞不同郊社禮
科儀一一聖人裁

香臺紫氣藹晴空靈貺神休集聖躬
垂拱萬年如一日
禮臣何必議青宮

內宮新製玉清符獨賜親臣道
允字何事官家頻顧問
宰公冠上戴曾無

真人方術鬼神愁出入金鑿駕玉虬濟北少翁曾賜爵
膠東樂大已封侯

金符寶笈護雲英鸞鶴銜將入上清拜受玉霄龍鳳簡
元陽象一字分明

聖朝臣庶洽垂裳慟哭非時祇自傷竟日天威無霽色
容城年少有封章

仙真異迹豈無因海嶽靈區合有人夜殿焚香親製草
詰朝分遣內臺臣

蓬萊方丈可梯航
勾漏丹砂近寄將
昨鑄銀山高幾許
試持玉尺殿中量

瑞氣祥雲薄海濱
遠藩齊獻百千春
進來白鹿高於馬
馴擾金階不畏人

頌美揚休錦繡香
柘黃新帕益青箱
內中書法人間別
壽字能兼數字長

君王常在集靈臺
正殿歲筵鎖翠苔
縱是明良不相見
虞廷庶事轉康哉

方士如雲泛海槎采真元不為丹砂萬金煉就壺中藥
愁殺仙人萼綠華

五憶詩有序

戊寅秋日余苦下體沉病偃仰一室莫與晤言
明月青山數馬通夢頗憶閩閭城外素所游適
之地屈指有五乃各賦一詩以貽山靈
毋哂經時之不至相期非久之重來爾

十人石明月

明月青山短簿家笙歌幾處醉流霞
瑤光浸石翻疑水
玉露溥空盡作花

文殊寺石壁

朱剎孤危寄上方青冥鷲嶺獨徊翔雲霞散落千層綺
日月昭回萬仞光

石湖草堂

芸窓斐几綠雲流數畝琅玕一徑幽愛住浣花唯杜甫
常來看竹有王猷

虎山橋秋水

石梁秋水漲平蕪髣髴瀟湘入畫圖震澤連天浮玉鏡

洞庭分岫浴青鳧

玄墓山雙桂

玄亭迴合衆山蒼
芟服初栽葛屨涼
雙樹賸能飄桂馥
九秋祇恐敗蘭芳

和客邊亭四時怨

春

走馬沙場春暮時
柳條纒綠向南枝
彎弧莫試新開葉
留與征人贈別離

夏

關城榆柳亂鳴蟬
晚浴蕃兒飲馬泉
不去平蕪驚鴈乳
天涯音信鴈能傳

秋

寢甲邊場淚暗流
忽看明月又逢秋
昔時雙照深閨影
今夜孤懸絕塞愁

冬

隴水冰堅萬騎屯
陰山雪積玉為門
禦寒悉是閨中力

浪說軍前挾纊思

和客閨中四時曲

春

草長花落徧關山久客翻愁歸路艱
使子規空叫月三春不見有人還

夏

為愛芙蓉水上開漫將羅襪染芳埃
竝頭欲折何曾折纔入木蘭風雨來

秋

瑤琴寶瑟寂無聲
只有寒蟬柱下鳴
海月一輪通夕照
姮娥應悉此中情

冬

庭樹紛紛霰作花
北風吹卷入窓斜
天山積雪無歸路
不是征人不憶家

曹太史席上二詠

歌

紅牙翠袖按清商
暫見塵飛玳瑁梁
宛轉盡能諧律呂
主人無忝蔡中郎

舞

矜嬌顧影盼雙蛾
尚怯當場掩袖羅
不赴襄王夢行雨
却隨學士舞回波

弇山園漫成二首

甲第名園綠水洲
茂林脩竹羽觴流
當年袞襖須臾事
今日蘭亭坐卧游

曲檻文漪綺席香高臺雲樹晚蒼蒼分明江左東山墅
不見歌塵起杏梁

携兒子允文登虎丘寺有感昔遊

暇日停舟綠水隈芳菲不盡夕陽臺舊遊零落何須問
一寺青山父子來

解嘲堂飯治兵使者幕客康從理

雞黍無能尚借人臨邛貴客豈知貧穰田事事須更僕
媚竈區區太主臣

山中二首

清溪瀑溜碧潺湲，猿鶴幽棲夕照間。
采采紫芝高嶺上，携筐兼得白雲還。

空山樵路石嶙峋，麕鹿悠然狎隱淪。
松下流泉清似玉，一瓢同漱潁陽人。

越中閩帥席上

蓮花為幕玉為觴，鸚鵡留題倚鷓鴣。
三載蒯緱蕭索盡，從君拂拭吐寒光。

送客赴嶺南幕

浪說功名馬伏波少年心事在橫戈
茲遊得假樓船節
魁結先看解尉佗

春日花下飲

春風青鬢未成絲放逐江湖只酒卮
二十年來真落魄
不曾醒眼看花枝

寄長安舊遊

金吾將士羽林郎舊日交遊盡老蒼
為報吳鉤貧未賣

猶堪提挈到沙場

同胡侍御崑山傅處士宅看菊

坐見南山對草堂
短籬秋色一樽香
從知野外柴桑菊
不畏臺中御史霜

三月望與謝都尉玄妙觀賞月

春城樓觀列仙家
五夜杯餐五色霞
庾亮從來為明月
玄都不是看桃花

寓楞伽寺二首

楞伽山寺蔚樓臺湖水臨窓天鏡開巖下疎松池上竹
清音日夕靜中來

寂寂山阿借考槃寒雲飛盡暮鐘殘五湖秋水千林月
一片禪心此並觀

淮南秋日感懷

淮海清霜徧楚宮妍華零落感傷同不知客鬢今朝白
但見江楓昨夜紅

宿寒山寺即事

江連雲樹路迴斜
鐘起寒山亂暮鴉
傍水花枝渾解語
東風吹入梵王家

病起訪曹子念

惆悵朱顏鏡裏更
尚餘肝膽照人明
相逢不盡悲歌意
萬里滄溟紫霓生

宿弇山園水閣

層楹虛閣宿流雲
飛盡觥籌夜色分
河漢轉低池水白
海天霜角醉中聞

漫興

館娃宮畔采芳菲
相謔曾將芍藥遺
白雪漫言人寡和
醉操銀管與文姬

庭桂

室如懸磬酒如泉
獨酌悠然桂樹邊
重惜金莖不承露
也教離立草堂前

芙蓉湖送客

八月芙蓉湖水清
征帆一片挂離情
暮雲黯慘難為別

重唱驪駒待月明

江上寄遠人

萬里相思寄楚雲
三春桃李徧江濱
只因花裏逢君別
每見花枝便憶君

題隱士壁

棲息衡門有道風
落花流徑水溶溶
空山自愛聽啼鳥
人世何勞問卧龍

夕陽野望

漁梁夕照破寒烟
一望靡蕪徧野田
飛盡暮禽江水澗
青山欲斷白雲連

送僧遊天台

乘杯已泛赤城霞
飛錫何煩碧海槎
經過劉郎舊時渡
莫臨流水看桃花

寺居示弘上人

浩劫終期滅累塵
去來爾汝亦何因
空潭秋水深千尺
照見人間未了身

在明不赴王官之遷却寄

勲業如山亦易銷
况君官不過郎曹
縱然賦有凌雲氣
懶向梁園弄綵毫

朗生以春社不赴約寄嘲

羣兒盡駕犢車輕
傀儡場中簫鼓迎
紅杏春旗黃柳仗
家家社裏醉先生

山行

碧嶺崔嵬鳥道懸
夕陽明滅白雲邊
芥斤不入山林靜

鳴鶴一聲聞九天

寺夜

解網超然獨出家能持一戒破諸邪空門八月高秋晚
皎皎青旻片月華

弇山園夜雪

綺閣玲瓏夜有輝却看玉樹轉霏微主賓醉後操銀管
併作瑤華散漫飛

上方寺晚眺

孤亭登眺夕陽間木落秋空雙鳥還湖上白雲飛不盡
却聯紅樹亂青山

得友人書頗及勸駕之語漫答

春暉滿地照懸鶉羞說彈冠仗故人雪後僅存東郭履
不堪重踏洛陽塵

松陵舟次呈治兵憲使馮公

花撲樓船錦纜香兵符春暖不飛霜山公一夕同樽俎
能使千秋重葛疆

送李長洲以艱歸濟上

六月寒侵楚水涯
冰紉為幕雪為車
但凋濟上王生栢
無損河陽潘令花

託潘子會致詢沈君典

傾蓋交情別後真
憑將桐水寄殷勤
懷中一片滄溟月
欲報宣城郡裏人

送客

江干四牡正駢駢
猶對離樽戀夕暉
一領青袍凋落盡

送君行矣賦無衣

偶贈

佳人燕趙獨傾城善舞陽阿掌上輕為雨為雲不知處
襄王夢裏自分明

袁生五十詩

爰生浪飲日亡何漫遣文章應制科六十公孫猶牧豕
較來還少十年多

寄嘲朗生

生計年年問館娃，虎頭痴絕不思家。
賣文纔得錢千百，不買青山只買花。

送謝生以南粵戰功謁選北上二首

三載親從上將牙，水軍十萬下珠崖。
漢庭若薄征南賞，海外何人斬呂嘉。

戈船下瀨盡邀勳，年少登壇獨出羣。
不是終軍功易建，却因楊僕捷先聞。

山居書懷

薜蘿垂戶閉雲烟永謝區中未了緣待得三秋明月夜
青松影裏弄寒泉

堯峰寺同山甫丈看月

高山月出動湖波寶樹珠光夜若何自是清暉戀岑寂
那知人世有笙歌

湖上遲客

石湖溪水碧於苔烟雨扁舟去復回恰有桃花一千樹
春風能遲阮郎來

訪葉茂長

白雲常護草玄亭誰識江南有客星問字未回邀笛至
芙蓉湖上不曾醒

丹陽道中作

高阜荒荒古木稠南徐江水送行舟河山已帶中原色
風雨今為北道愁

高郵湖即事

白馬湖邊白浪生吳儂船在浪中行已知到處風波急

何事栖栖問水程

北河地名楊柳青於此送客

兩岸蟬聲客夢醒
片帆初落暮雲停
故人無奈年年別

江北江南楊柳青

喜幼元以光祿遷京兆參軍

再看新綬縮銅章
年少常趨鶴鷺行
花拂綠窓仙署曉
畫眉未了又含香

贈安茂卿

纔入燕京便有聲少年慷慨說荆卿黃金只就青樓醉
不識西園可市名

貽馬用昭

蒼頭款段自長途不事輕肥騎從都獻納舊臣如薦士
孝廉公子世間無

潞河舟中寄朱在明

潞水潺湲愴旅魂故人共月中樽如何咫尺春明路
恰似吳門憶薊門

約幻元訪彭廣文寓

月落初聞長樂鐘
車如流水馬如龍
寂寥誰識揚雄宅
載酒同君一過從

送茂卿還無錫二首

玉露金莖未易攀
西風斜日送君還
潞河楊柳今搖落
愁殺江南庾子山

秋風落葉滿城頭
才子思家倦遠游
明月放歌何處好
芙蓉湖上一扁舟

飲幼元寓齋二首

不聽延秋門上烏相逢且自對呼盧只今混迹金門客
元是高陽舊酒徒

一樽清夜共閒論幾見長安月色新
勢位不常財是累
古來貧賤好驕人

長安送客

上林花滿未曾看客舍霜飛把缺彈
賦就不逢揚得意
且騎款段出長安

廣陵逢陳郎

竹枝歌罷說離情
草綠揚州水上城
憶汝怕逢顏色似
杏花開處不曾行

題桃花畫扇

碧桃樹底醉流霞
記得當年翠袖遮
今日漂零歌扇在
令人腸斷故園花

阻風

西風吹浪不能平
又阻歸舟一日程
正是關河愁絕處

柳條無數作秋聲

伐檀齋集卷十二

欽定四庫全書

伐檀齋集諸名家贈答詩

五言古詩

毛文蔚

字豹孫
太倉人

承瞻美子念左虞三君子枉顧小飲漫述

蓬廬日偃息賓從忽來儀開徑蕩暄濁清雲澹逶迤翩
翩諸君子才藻何陸離倜儻推王生排難固不辭曹丘
好游譽慷慨富文詞張侯更豁達五斗輕金龜惠顧良

不薄寫我久懷思
翹林鬱蕭瑟陽景相蔽虧
願得素心賞曷知黃髮期
無為射聲利磬折多酸悲

周天球

字公瑕
長洲人

七夕集諸君子於草堂左虞有作率爾奉同

今夕是何夕雙星一何朗
置酒臨前除陳簋乏方丈儼
然數君子嘉會喜成享
初月流青旻河漢澹無象
鳴蟬咽露中孤松出雲上
清言久忘醉空堂能致爽
觸景慨時流居閒心自廣
哲人重明德邁士耽玄賞
帶礪須公

等鹿豕元吾黨願各保朱顏慎勿居執掌

朱察卿

字邦憲
上海人

承左虞燕京惠詩却寄

迅風激高雲朔雁正南翔良友在長安寄我詩數行恍
聞漸離筑忽灑燕山霜肝膽兩相照然諾安能忘結轡
爾優游塊處吾傍徨久挾三千牘不共侏儒囊空射箭
頭書無益聊城亡嗟嗟竟白頭蓬蒿淚沾裳丈夫抱遠
略策名在疆場不知漢天子曾復問馮唐

七言古詩

王世貞

字元美號鳳洲太倉人

承左虞兄過訪贈余長歌感激用壯聊爾志答

張侯若乳虎少負食牛氣生平所不平舍兒比國士懶
為大將長揖人何況州司折腰吏腰間累累金符黃再
懸再擲還君王桃葉渡頭解兔鶻柳花店中脫鸕鷀寧
容醉尉呵止宿甘與侏儒共一囊雖然落魄高陽里畢
竟難呼紈袴子當懷明月將報恩入匣清霜少知己以

茲宿草荒蔣徑時復扁舟下婁水興來贈我長歌行伯
氏復與施丹青恍如輞川入我案又似易水濺濺鳴虹
雲繚繞氣鬱勃珠璣錯落光縱橫丈夫有才終有用為
汝感慨神俱竦生欲椎周子南牀死欲掘顧元公冢嗣
宗見忌雙眼色宣明可憎一面孔汝慎勿學灌將軍我
非竇家老秃翁偶然小醉漏消息前身自是汝南公但
遇人間失意事相將跳入玉壺中

錢允治

字功甫
吳縣人

長歌贈左虞世丈

將軍干城自赳赳豈徒置兔稱馬走人看燕頤復鳶肩
不識錦心仍繡口曾懸金印耀兜鍪樓船笳鼓淮之洲
秋風萋菲生道路拂衣歸獵南山頭南山歸獵不得意
青鬢朱顏那可遲但須肆志美遨遊肯令高抱空憔悴
醇醪八斗醉不醒向人白眼無復青有時揮毫吐胸臆
倒踏泰華翻滄溟散為雲霞結為綺狂呼老杜醉呼李
誰言匡鼎能說詩一時儕輩莫可擬琅琊中丞人中龍

推轂唯稱張長公
奔山似是習池上
葛疆日日陪山翁
歸來烟月五湖冷
獨往翩然如泛梗
幾向山僧乞石牀
時逐飛雲度前嶺
憶昨值我橫塘西
相將携手尋招提
深林跌坐花疑雨
青天揮盞醉如泥
坐擁沙彌不知返
醉語咕嚕日漸晚
扁舟蕩漾菰蒲深
仰天大叫髮媿媿
胸中壘塊澆仍多
土木形骸奈爾何
若令借與桃花馬
定墮城邊綠玉波
與君通家非一世
與君結交在綺歲
年來詞賦窮而工
風期汗漫遙相勵
余亦窮途失意人

讀書三十未成名縱君坎坷無遭遇豈似吾徒終歲貧

顧

願字願甫
吳縣人

張侯行贈左虞都尉

吾觀今古兜鍪士銀鞍繡轂沾沾喜學書纔足識姓名
矢志唯堪取金紫登樓清嘯久莫聞橫槊題詩竟誰是
迺公馬上嫚詩書胄子人間艷紈綺今之都尉古徹侯
張侯事業非等儔鄴架從知蠹魚樂董帷常抱書生憂
詞賦儼然挾西漢風雅直欲追東周崔弁胡纓塵一尺

綠沉金鎖閤三秋偶然肘後黃金耀何為又轉樓船漕
豐草長林麋鹿心金羈玉勒非其好視之敝屣且擲還
偏促不耐蓬蒿間木蘭一葉浮綠水醪釀十斛尋青山
余家住近青山下落魄無心問耕稼奚啻平原十日留
高陽徒侶無冬夏邇來散盡牀頭金朱顏恐受白髮侵
丈夫有懷自激烈何嗟獨未逢知音君不見萬鍾世祿
倉廩積牙籌會計靡遺策瓊軒綺構入青雲北邙好占
山盈尺又不見介冑功高享茅土分符秉鉞氣食虎一

朝失意歸窮巷夜行小尉乘醉侮何如張侯富貴輕獨
把明月凌滄瀛有曲真堪和郢雪無字不可償連城雕
蟲寧恥壯夫事附驥敢羨昇天行一時不顯張侯跡千
秋不朽張侯名

僧真弘 堯峰

辱張侯以長句送歸清暉軒小隱勉爾奉酬頗
深勸駕

張侯久發空門心肘後擲去纍纍金自是人間不得意

却來方外尋知音常住楞伽山一場不遠城郭猶塵土
望見堯峰霄漢間紫芝黃鶴誰為伍同蠟登山屐兩雙
重開絕壁雲中窓宰官不現當年相居士從知舊姓龐
負米捐金良不惜剪拂孤松挂孤錫巔岼鑿構無數椽
丹青薜荔空山寂孔雀函前照慧燈寶雲泉水清如水
出世住世俱稱佛無髮有髮同為僧支郎室裏天花積
虛席淹留謝安石遠公開社白蓮上醞醐獨設陶元亮
張侯知識非常人建得功名誰是真不如精進山中業

或能一悟超千春

五言律詩

吳履謙

字幼元

左虞醉卧小齋漫贈二首

君遂忘麟閣吾安有鳳毛
飛騰多枳棘睥睨自蓬蒿
夜月荆卿酒秋風范叔袍
燕歌聽不盡孤枕向來高

爾汝窮交密寒暄逆旅深
鶡冠全白髮駿骨幾黃金
對酒那無頌看雲孰有心
釣竿持欲贈烟水五湖潯

顧雲龍 字從化

答左虞

雕蟲堪厭棄汗馬亦浮沉
問產家人薄論交國士深
一丘非豹隱雙劍或龍吟
聽罷青衿詠悠悠傷我心

陸

治

字叔平
吳縣人

左虞過訪漫答二首

學稼甘吾老看花喜客留
鶴鳴童錯應鶯語妓先誅
山水將身隱圖書足卧游
君家雙玉劍尚在匣中不

東帛慚丘壑揮鋤自畝塍避人聊伏臘閱世任飛騰勞
來親龔遂交游重李陵白頭元舊好青眼代相仍

曹昌先

字子念
太倉人

答左虞都尉

披褐裹連城誰憐後世名艱難諳物態老大減才情我
既寧為我卿還自用卿家鄰東海上不負魯先生

申時行

字瑤泉
吳縣人

贈張左虞都尉

暫爾無推擇居然一隱淪才高應不賤祿厚豈長貧
緩帶聞羊祜投壺識祭遵他年傳儒將君肯後斯人

姜寶

石城人

訓左虞過訪二首

命駕故人遠論心國士偏水亭寒欲雨村樹澹生烟
解榻因徐穉留刀為呂虔青山連建業王氣酒杯前

憐君猶據馬愧我久焚魚春草綠無盡暮雲閒自舒
漢庭新禮樂卻氏舊詩書努力毋相負燕然好策車

錢允治 見前

誚左虞都尉二首

知君才不偶且復混行藏
官冷門羅雀家貧劔脫裝
旌閭細柳詞賦阻長楊
仲孺憐猶在相看醒更狂

遂忘將軍勢還同處士遊
青山雙屐遍白社一樽留
倚馬鞍空據雕蟲筆未投
任安真長者吾豈慕曹丘

曹昌先 見前

移居呈左虞四首

一壑堪投老清時似避秦
康衢忘帝力斗柄識王春
帶卷揮鋤急行歌抱甕頻
衡門終日閉敢效著書人

籬落逐谿斜悠然野老家
縱橫聊種藥次第亦開花
錦里先生芋青陵處士瓜
逡觀時物變吾意已無涯

幽居無不可樂事此生偏
瓶粟充賓飯園蔬辦子錢
魚跳新漲濶鶯語舊林顛
小閣堪舒眺登臨一快然

檢點生平事孤蹤亦太奇
一貧猶負俠半黠不勝癡
姓字時乎隱行藏日者疑
惟餘寸心在耿耿欲酬知

七言律詩

黎民表

字惟敬廣東從化人

贈張將軍

之子江東舊隱淪
乍來惠我一杯尊
常留白羽吟邊月
不望朱衣座上春
邂逅何辭邀笛醉
行藏空老據鞍身
王朝執戟元無補
草閣耽玄豈異人

張九一

字助甫河南新蔡人

贈左虞都尉

雪盡吳閭柳未柔，鸕鶿共脫酒家樓。
呂蒙何必行間識，謝奕應從方外求。
紫壑三春深霧隱，滄江片月挾珠遊。
菰蘆執手無窮意，欲向明時賦四愁。

王世貞

見前

看左虞與仲德姪轟飲

小阮時時酒債多，况逢江左步兵過。
相逢只解呼紅友，半醉猶能卷白波。
百斛從傾銀鑿落，兩山旋對玉傀俄。
欲投客轄翻愁住，將恥吾壘奈若何。

曹昌先

見前

酬左虞見過

草堂幽僻謝招尋
把臂何來此竹林
恨不抽簪猶世網
且從抱甕息機心
浮名欲附青雲遠
至理無如綠酒深
莫怪絕絃心獨苦
人間那得幾知音


七言絕句

顧孟林

字山甫
蘇州人

堯峰月夜同左虞賦

空中樓閣暮氤氳此夜人間不著君我欲相從一片月
不知身是此山雲



伐檀齋集諸名家贈答詩